

**Tahir
Pirbhay**

DESTIN

pyes teat



Tahir Pirbhay 2005



**PLAYWRITING COMPETITION 2005
FIRST PRIZE
CREOLE SECTION**

*- Mersi Nazeemah, pu ankuraz mwa
partisip dan sa konkur-la*

- Pu mo nuvo lemond

*Pour que les dieux s'amuse beaucoup,
il importe que leur victime tombe de haut.*

(La machine infernale, Jean Cocteau)

PREMYE AKT

Rido ouver ek "lavwa" fer bann spektater familie avek deroulman premie akt. Lavwa li trouv derier senn. Lor senn, dekor enn salon. Enn kanape lor ki Izabel pe alonze ek lir enn liv. Mari pe met lord ek Bernar pe asiz lor enn sofa, ki trouv a gos kanape, pe lir zournal. A drwat enn sofa vid.

Lavwa:

Imen nou bann pantin ek lakord dan lame bonjie ki par plezir ouswa par foli ek kitfwa par distraksion kre bann destin ki imin mem si li anvi pa kapav sanze. Marsel apre vintan, linn desid pou fer lape avek so konsians. Enn dimans gramatin linn retourn dan Bourvil, ki li ti sove, kan so bieneme Madlenn ti anons li ki li pe sarie so zanfan dan so vant. Enn zour li ti telefonn Madlenn ek nouvo proprieter ti anons li ki Madlenn inn desede kan li ti donn nesans enn tifi ek enn koup ki pena zanfan ti adopte tifi la.

Li ti penetre dan sa lavil ki ante par bann souvenir ek so bann pese, dan enn brouyar liver, ek sak respirasion ranpli ar remor. So lizie dezespere pu trouv Madlenn dan figur so zanfan, enn zanfan ki li pa mem konn so non ek zame linn trouve.

AKT 1

Personaz: Marsel, Mari, Bernar ek Izabel

MARI – Pe tape !

BERNAR – Abe al ouver matlo !

MARI – Weh, pran mo mem pou zot servant. Papa piti amenn rol intelektual pou kashiet zot pares. Nanie zot pa vo. Si pena moi sa lakaz la pa ti pou enn lakaz me enn park koson !

IZABEL *riye* – Ale madam, ouver laport la. Enn trale tapaz pou nanye.

MARI *al ouver laport* – Ingra ! Insolan !

Mari ouver laport ek nou tann Marsel so lavwa me li pa paret lor senn.

MARSEL – Bonzour Madam Mari.

MARI – Bonzour misie. Mo pa pe rekonet ou.

BERNAR – Dir li rantre papa ! To pa trouve ena lapli deor.

MARI – Rantre misie.

Marsel aparet lor senn premie fwa. Li pe sarie enn ti valiz.

MARSEL – Bonzour misie Bernar. Ki manier ?

BERNAR – Bien merci ek ou... ?

MARSEL – Monn vinn la pou rod enn dimounn ek mo bizin enn lasam pou inpe zour.

MARI – Exkiz mwa me mo pa pe rekonet ou. Kouma ou konn nou non ? Kouma ou kone nou loue lasam ? Nou ekrito ti anporte par siklonn semenn dernier ek ki sana ou pe rode ?

BERNAR – Les li asize ! Les li relax ! Ase ar to bann kestion. Mark zis enn iniform ble lor twa ek sa vilin kasket sipaki la, pou to paret kouma sa sovaz kinn donn mwa enn kontravansion yer swar.

MARSEL – Kalme ou Misie Bernar. *(li get Mari)* Mo ti deza vinn res isi pou enn mwa. Mo apel Marsel...

BERNAR – Donn mwa ou valiz. Mo amenn li dan lasam ek met enn ti lord. Asiz ou. Mari, servi li enn kistoz pou bwar do !

Mari ek Bernar sorti depi lor senn, sakenn so kote. Marsel poz so valiz parter ek Izabel bes so liv ek get Marsel.

MARSEL *avek enn surir* – Dan sa lavil la, zis batiman inn sanze, mantalite dimounn touzour parey. Lor tou miray ena lafis inn kole ek aswar preske tou dimounn pou abiye ek makiye kouma dir zot pe al maryaz, pou al pey bann boufon pou fer zot riye dan teat. Bann dimounn dan sa lavil la repite pou al teat, me ofet, li enn sirk ! Zot pe ankor lir mem liv... enn swadizan poet ki net konn fer son ar mo... Seki ekrir bann ver, zot pa neserman bann poet, zot zis bann ekrivin ver.

IZABEL – Ki ou kone dan poezi?

MARSEL – Mo apel Marsel Talon.

Mari rant lor senn avek enn ver zi lor enn plato ek servi Marsel.

IZABEL – Poet la ?

MARSEL *asize* – *(get Mari)* Mersi. *(get Izabel)* Wi limem. Mo ti deza vinn dan sa lavil la, res dan sa lakaz la vintan avan. To pa ti ankor ne.

MARI – Marsel Talon... sa non la dir mwa kitsoz... Ki sanla ounn vinn rode ?

MARSEL *poz so ver ek leve, fas a fas ar Mari* – Mo pa konn so non me mo ti pou bien kontan ki ou dir mwa.

MARI – Mo pa mem konn ou... ou pa mem konn seki ou pe rode la so non ek ou le mwa mo dir ou... Eh ou la ! Mo pa dan longanis mwa...

MARSEL – Monn vinn rod Madlenn so tifi.

MARI – Madlenn so tifi ? Ah bon !... Ah ! Bondie ! Aster monn rekonet twa ! To ti fer vilin ar sa tifi la ek to ti kit li ater! Pov tifi, tonn touy li ! Vin banane inn pase, ki tonn vinn rode aster ? So

zanfan ?! Zanford ki to pa mem konn so non! To pe santi twa papa aster? Kan piti la fini grandi, kan to pena okenn sou pou done ? Kan to pena okenn responsabilite ? Asasin !

BERNAR – Kinn arive la in ? Kifer to pe kriy ar nou klian koumsa ?

MARI – Vini Bernar, vini. To pou konpran tou la. Mo prezant twa Marsel Talon, gran poet. Repite pou so bann parol demoniak ki atir so bann viktim. Asasin Madlenn ! Desann so valiz, li pa pou res la, pa dan mem lakaz avek mwa !

BERNAR – Ferm to lagel do ! Ahhh ! Pa apel li asasin, li pann touy person. To bien kone ki Madlenn ti mor kan li ti akouse. Pa koz gonaz ! Li pou res lamem ek mo pa le to koz ek mo klian koumsa.

Bernar ris Mari par so lame amenn li dan enn kwin. Ek koz dousma.

BERNAR – To pa kone nou bien bizin kas. Mo pa kontan li res la me plis ki de mwa nou pann gagne enn klian.

MARI – Me mwa mo pa pou koz ek li. Apre tonn bliye...

Bernar retournn devan Marsel

BERNAR – Mo demann ou exkiz pou tou seki mo madam inn dir ou. Li tro emosyonel...

MARSEL – Non korek sa. Mo konpran li. Li vre ki dan mo zenes mo ti komet bann erer ireparab.

BERNAR – Izabel pou okip ou tan ki ou res kot nou.

IZABEL – Wi papa, li pou enn loner pou mwa !

MARI – Oh ! Bondie !

MARSEL – Pli vit mo gagne seki monn vinn rode pli vit mo pou ale. Mo pa anv anbaras zot. Monn vinn rod Madlenn so tifi. Mo ti tann dir ki enn koup ti adopte li ek zot res dan sa lavil la.

BERNAR – Mo...

MARI – Trwa semenn apre ki zot ti adopte li, zot ti kit sa lavil la pou touletan. Person pa kone kot zot inn ale ek zame zot inn pas par isi. Pa ti ankor mem met non ar zanford la...

Marsel asiz lor sofa, figir dan so lame. Mari siyal Bernar ek zot sorti lor senn vit vit san fer tapaz. Izabel leve ek asiz lor lamans sofa kot Marsel pe asize ek so lame ezite pou konsol li me finalman li resi.

Rido

DEZIEM AKT

Rido ouver lor enn bar. Devan bar ena enn latab ek trwa sez. Pol ti pe souy bann ver.

Lavwa:

Spektater, zot pou temoin laverite ki pou fer zot soke. Nou dan enn bis ek lor volan ena enn sofer fou ek li pe al tro vit pou ki nou resi al ziska li ek pran kontrol. Devan ena enn falez... Zot pre ?

AKT 2

Personaz: Mari, Bernar ek Pol

Nou tann laport pe tape.

POL *get revey* – Ki si sa ! Dimans gramatin wit er zot pe tap laport mo bar. Eh ou la! Pas dan lapre midi, al lames do ! Zot anv tann mo non dan lames ? Ki si sa !

MARI – Pol nou sa, Mari ek Bernar. Ouver vit.

POL – In ! Bofrer belser, par ki zot inn leve zordi. Zot inn met zot pat elefan la ?

Pol kas enn gran riye ek al ouver laport. Mari ek Bernar rant vit.

POL – Dabitid zot al lames sa ler la. Kinn arive, zot pe rapel zot zenes ? Par ki zot inn leve zordi ?

BERNAR – Ferm to arrr ! Matlo ! Twa ek to ser apart pata pata pakonn nanie.

MARI *an larm* – Linn vini... Linn retourne...

POL – Ki sanla inn vini? Ki sanla inn retourne?!

BERNAR – Marsel...

POL – Ki sa Marsel la sa ? Ki li pe rode ar zot ? Pa dir mwa zot dwar ankor dimounn ! Komye zot dwar li ?

MARI – Marsel Talon! Linn vinn rod so tifi. Samem zour mo ti pli per ek dan tou mo laprier mo inplor bondie pa fer mwa trouv sa zour la. Pa kone ki pese monn fer.

POL – Kot li pe reste ? Linn kone pou so tifi ? Ki zot inn dir li ?

BERNAR – Li kot nou, lakaz. To konn nou leta, nou travay inn tonbe net... me Mari inn dir li ki nou pa konn nanie. Enn koup ti adopte Madlenn so zanfan ek zot inn demenaze apre troi semenn ek personn pa kone kot zot ete. Li pou bizin vinn fer enn letour dan to bar. To dir li parey. Enn sans linn vinn kot nou premie !

POL – Pou komie zour li pou res kot zot?

MARI – Monn dir Bernar pous sa lisien deor, me non, linn perdi so lamour prop pou larzan. Kouma dir ti koup so lonbri ar kas.

POL – Non Mari, okontrer! Bernar inn bien fer. Prefer linn vinn kot zot mem avan ek poz zot sa kestion la sinon li ti pou fini konn laverite. Mwa mo dir tan ki li dan Bourvil les li res kot zot. Pou komie zour li pou reste ?

BERNAR – Mo panse li pou ale vit parski linn gagne so repons. To panse nou bizin kasyet laverite Pol ?

MARI – Bondie pa pou pardonn nou. Nou ti pou al get monper me...

POL – Ah pa al dir li sa, tou seki pas dan so konfesion zot tou fini kone. Zom palab la ! Pa kone par ki trou linn pase pou vinn monper. Mesaz pas mari vit kouma dir li branse lor ADSL. Nou bien kone seki pe arive pe mal arive. Me seki ti arive ti mal arive. Pov Izabel, si li al kone ki so papa enn kourer... ek zot pa so vre paran... kouma li pou sibir sa! Izabel, enn zanfan bien frazil, to kriy ar limem li kapav koumans plore. Non ! Li pa merit sa. Ofet kot Izabel ?

MARI – To bofrer inn dir li okip so klian. Senier! Si li al kone sa zanfan la so tifi... Li pou pran mo tifi li pou ale !

Mari kas enn gran plore.

POL – Non do. Li pa pou kapav pran Izabel ale. Izabel mazer, personn pa kapav desid pou li, ek zame li pou kit zot li pou ale. Pa pou enn sovaz kouma sorpa la.

MARI – Pourtan so lizie briye kan linn tann Marsel Talon so non ek li pe bien kontan pou okip li, premye fwa mo trouv Izabel interese avek enn klian koumsa.

POL – Me so lizie pou ranpli ar laenn ek degou kan li pou konn laverite. Li pa pou kone si zot res trankil, me si arive linn al kone par lezot, pa kas latet. Izabel pou res avek zot. Li enn bon tifi. Li ena bon santiman ek bon ledikasion moral. Ek kitfwa so lamour pou plis pou zot. Me seki pou trist ladan, li ki pou soufer plis ki zot tou.

BERNAR – Nou bizin to servis Pol.

POL – Koze. Tou seki zot le.

BERNAR – Nou pe al vizit bolfam so lakaz ek nou pou retourne dime swar. To zet enn koudey lor Izabel ek Marsel.

MARI – Nou pa neserer ale aster la. Nou kapav atann lot wikenn. Li pa sa grav la non? Sak fwa mem kouyonad.

BERNAR – Ferm to lagel sovaz ! Si to pa ti enn bon belfi, mwa omwin mo enn bon mari, enn bon papa ek enn bon zanfan. Mo rekonesan anver tou seki linn fer, kitfwa tonn bliye nou bann move zour kot li ti ofer nou so twa san nou ti demande. Si torma ti malad to ti pou sot dan ler !

MARI – Pa koz mor ma in ! Si zordi nou proprieter enn lakaz, gras a kisanla ?

POL – Aret lager papa ! Depi zot frekante ziska zot vie zour mo konn zot diskite mem. Vini Mari, vinn asiz enn tiginn.

Pol fer mari asize ek al derier bar, amenn trwa koup ek enn boutey divin rouz. Li servi zot tou.

POL – Me zot pa ti rekonet li ?

MARI – Non. Linn sanze inpe. Fodre linn dir so non pou ki monn rapel. Linn grosi. Mo pa krwar lezot pou rekonet li.

POL – Twa Bernar ?

Pol asize.

BERNAR *pe asize* – Non. Ditou. Mem apre ki Mari inn dir mwa. Inn gagne vintan parla... Kan tou pas bien, letan pas vit ek lepase paret bien lwin ouswa etranze.

POL – Tou dimounn ki konn zot finn gard zot sekre bien. Mo pa krwar ki aster la ki zot pou al rakont laverite. Ena dimounn si zot al kone Marsel dan lavil, zot pou kapav tabas li tou.

Pol pran lame Mari.

POL – Pa per Mari, pa kas latet Bernar. Tou dan nou kote. Pena nanie pou per. Fini zot ver, mo kondir zot lagar. Mo pou veye ki tou pas bien.

Rido

TROIZIEM AKT

Rido ouver lor enn dekor enn lasam dormi bien dezord. Izabel dan enn rob blan kouma enn anz...

Lavwa:

Lemal degize dan seki ena pli zoli lor later, lamour. Izabel, inosan, inioran, pou rakont zot so boner ki linn ekrir pou so paran me pou zot ki deza konn laverite, zot pou ekout so trist maler. Bernar ek Mari avek konsey Pol, ti desid pou kamoufle laverite pou ki Izabel pa afekte me zot mansoz pou kre pli gran fatalite.

AKT 3
Personaz: Izabel

IZABEL :

Linn disparet dan enn brouyar parey kouma li ti vini
Li pann dir moi orevoir parski li enn mo ki desevoir
Enn bizou ranpli ar pasians pou atann so nouvel
Linn les so tras dan mo lekor ki ante par so lespri

Zame mo ti panse ki sa pou ariv mwa
Mwa ki lezot ti panse mo pena santiman
Enn santiman ki avan mo ti trouv li denigran
Enn fierte pou nou febles ki apel lamour

So regar lezard miray ki ti konstrir avek arder
Par bann droger intoksike ar moralite ek loner
Mo sourir blasfem fer li vinn mo nouvo kreater
Ek anter tu siperstision dan enn lanwit plezир

Tou seki zot ti montre moi paran bieneme
Bon kondwit, konsey eksetera
Tou finn refase par mo leker ki dezorme
Ena enn proprieter pou ki li bate, pou ki li viv

Avek li dan mo kote li enn imans plezир pou
Mo deklar infelidite anver zot ki monn swazir fidelite
Paran adore zot kinn finn fer plis ki ti bizin pou mwa
An retour mo ofer zot mo sinserite lor enn bout papye

Zot ki ti per ki zot tifi pa normal ouswa indiferan
Zot ki ti invit enn ta garson pou fer mo rankont
Ki mo ti repouse kouma bann salte avek degou
Wi zot tifi zordi kouma zot ti anvi, li amoure !

Paran zot ki ena gran konfians par mo inosans
Mo pa ti kapav anpes seki ti arive yer swar
Mo pa ti mem anvi anpes li parski mo ti anvi ek mo anvi...
Zot tifi inn vinn enn fam premie foi linn amure

Akoz mo bien kontan zot ki mo pe konfie
Mem si mo pena kouraz pou dir zot sa an fas
Mo pena ni freyer ni remor pou seki inn pase
Mo zis onte pou dir zot ki monn grandi

Zot figir bizin ranpli avek tristes ek laenn
Me les mo rasir zot ki zot pena pou kas latet
Li ti fer enn erer me li ena gran regre, linn sanze
Marsel ador mwa koumadir mo enn bondie !

Li kapav de foi pli gran ki mwa me avek li
Mo santi moi pli zenn ki avek ninport ki zenes
Ek an sekirite, mo santi mem enn imans fierte
Kan mo konpar mwa ek bann ki dan mo laz

Les mo dir zot ki sa bann amoure la zot vilin, sal !
Zot sanz partner pou enn wi pou enn non
Zot leker kouma dir enn toilet piblik
Seki anvi rantre ek fer so malpropte, apre li ale

Non pli mo enn obze pou poz mwa lor letazer
Ek invit bann garson dan mo laz pou vinn gete
Si mo satisfere zot lizie ek zot dezir
Marsel li konn tret enn fam, avek atansyon, avek respe

Mo kone kouma tou paran zot pans bon pou zot zanfane
Me zanfane la li swazir seki so leker trouv bon
Ki pli gran boner pou enn tifi pou marye avek seki li amoure
Zot devwar lontan ti akonpli, mo devoir aster koumanse

Zame mo pou dezoner zot ek pli gran prev li dan zot lame
Kan zot pe lir sa let la mo pou kitfwa fini ariv dan lebra Marsel
Seki vedit li pann kouyonn mwa ek mo pe res kot li
Nou pou vinn invit zot pou nou mariaze bien vit

Rido

QUATRIEM AKT

Rido pou ouver apre Lavwa. Dekor: platform enn lagar trin

Lavwa:

Trwa mwa fini pase depi zour ki Izabel ti ekrir sa let la ek aprezan li dan Bernar ek Mari zot lame. Mari tout swit ti telefonn kot Marsel ek Marsel ti pran telefonn. Marsel ti gagne enn gran sok kan Mari ti avoue li ki Izabel so tifi. Li pa ti kapav dir sa Izabel, me linn tir enn pretex ar Izabel pou ki Izabel al kot so paran ek linn promet Izabel ki apre de zour li pou vini. Me kan Izabel ti ale, Marsel ti desid enn lot zafer.

AKT 4

Personaz: Marsel, Zinzin

Marsel ti pe atann so trin vini ek nou trouv enn nouvo personaz abiye an nwar koste avek li

ZINZIN : Marsel Talon.

MARSEL : Wi momem.

ZINZIN : Mo apel Zinzin ek monn vinn sers twa. Swiv mwa trankil sinon mo pou bizin servi bann gran mezir.

MARSEL : Par ki lotorite to pe koz avek mwa koumsa ? Si to pe pran nisa avek mwa, pare to lagel!

ZINZIN : Mo kone to pa ti enn krwayan me drol ki to pa konn mo non !

MARSEL : Mo ankor enn non krwayan ek kifer mo bizin konn to non ? To enn profet ? Enn selebrite kitfwa ?

Marsel riy foutan

ZINZIN : Mo non fer gagne frison. Zinzin, lanz lamor ! Monn vinn sers twa, ek amenn twa dan to selil.

MARSEL *riye* : Dan selil la ki ena ? Dife ? Lili pikan ? Mo pa dan mood badine...

ZINZIN : Non lanfer inn bien sanze depi seki ti revel zot. Bondie inn desid pou servi bann nouvo teknolozi pou evit polision ek saler ki dife fer.

MARSEL *riye* : Ah bon ? ... rakont inpe ziska trin vini ouswa vinn avek mwa dan Bourvil, to kapav vinn enn gran akter laba ! Zot bien apresie bann boufon kouma twa.

ZINZIN : Sakenn ena enn selil ek sakenn so pinision depann lor seki zot pa ti kontan kan zot ti vivan. Seki zot pa ti kontan pou an abondans dan zot selil ek zot pa pou kapav fer nanie. Twa par ekzanp, dan to selil pou ena desin bann lye sakre lor miray ki toule tan to ti denigre. To ti touletan pa kapav siport freser, alor prepar twa pou konfront bann freser inkroyab. To linz pou konfiske. Pa pou atas to lame nanye, me kouma monn dir, to pa pou kapav fer nanie. San are pou ena bann sante pou zoue bien for dan to lasam, bann sante ki to ti pe dir resanble zapman lisien ek bann

risar ki sant lor lamizer pou ranpli zot pos. To pou tann lavwa bann boufon kouma to apel zot, kan zot pe zoue dan teat Bourvil, mem zot repetision ! Pou ena sa viey fiy la, ki ena fwa to apel li sanglie ek ena fwa yoda, ki pou vinn rann twa vizit toule zour touni pou vinn riy twa, twa ki pa ti siport so figir ek so lekor. Linn gagne paradi ek mo demann mwa kouma... Anfin bref... Kan bondie ti lir enn imin so liv, kot ekrivin la ti ekrir ki lanfer li lezot, alor linn emerveye. Linn dir bizin sanzman! Linn fer kol lafis partou dan lanfer. Linn fer bel bel diskour pou sanzman, bel bel promes anver so bann anz me kan nou montre li ki nou apresie so diskour, vot pou sanzman, linn bliye so bann parol.

MARSEL *serye* : Kouma to konn tousala lor mwa ?

ZINZIN : Parski tonn mor ek monn lir to dosye ! To zis enn lam. Tonn resi to kou yer swar. Vinn avek mwa trankil ek to pou gagne to rekonpans.

MARSEL : Ki kou to pe koze ?!! To pena enn kamarad parla ki pe filme ek zot pa travay pou enn senn televizion ? Bann sovaz kouma zot bizin donn zot enn bon leson !

ZINZIN : Tonn bliye ? Yer swar to ti esey swiside ?

Marsel ranpli avek laraz sot lor Zinzin trap so kol ek esey tap li koudpwin lor so figir me so koudpwin pas a traver.

ZINZIN : Madam ki travay kot twa ti trouv twa inkonsian par ter antoure ek bann konprime zordi gramatin ek lanbilans ti vinn sers to lekor avan ki to lam reveye. Esey komie fwa to le, to pa pou kapav agres mwa, ek dezorme to pa pou kapav fer personn ditor. Madlenn, ek avan li apre li, pa kone komie fam ti vinn to viktim... ek finalman, pov Izabel, to tifi! To ler inn arive pou to al pey tou to bann pese.

MARSEL : Monn mor ? Seki veditou seki sa bann la ti rakonte ti vre... bondie, profet, paradi, lanfer... lanz lamor... lam...

ZINZIN : Wi, malerezman pou twa ! Me parey kouma to ti ekrir dan enn to bann liv, to pa pou regret nanye si seki zot rakonte la li vre. Alor ki fer to pe trakase ? Ek seki to ti ekrir lor bondie, si li ekzist, to ena rezon. Bondie li pa bon! Anverite, asterla ki tonn fini mor, les mo dir twa, ki satan li pa enn lot personaz, Bondie mem sa. Li kouyonn bann imin, dir zot ki satan isi, satan laba, me anverite, li fer zot ditor par plezir ek pou kamoufle so plezir sadik, linn rakont zot zistwar satan.

MARSEL : Kinn ariv Izabel ? Eski linn konn laverite ? Reponn !

ZINZIN : Pov tifi. Yer swar linn aprann ki twa to so papa, ek zordi gramatin linn aprann ki tonn desede par radio ek televizion sitan to ti repite. Pov tifi... Li pe ekstra plore. Lor la to zanfan ansint to zanfan... Mari ek Bernar pa kone kouma pou kasyet zot figir ar laont. Izabel pou vinn to lanterman demin. Pov tifi... Yer swar kan Mari ti dir li laverite, li ti krwar tonn deles li. Li ti krwar tonn sove parey kouma to ti fer ar Madlenn. Seki inn vreman bles Mari ek Bernar, kan Izabel ti montre zot kouma tonn fer li vinn imoral ar to bann parol ek to lamour pasazer... Izabel inn dir zot ki zame li pou kapav konsider twa kouma so papa, parski li bien kontan Bernar kouma so papa ek dezorme li pou fer tou pou trouv twa ek viv avek twa pou viv enn relasion mari fam.

MARSEL : Si mo ti kone ki pou Izabel so reaksion, zame mo ti pou esey swiside...

ZINZIN : Kitfwa aköz samem tonn gagne sa panse ki Izabel pou afekte ek pou ayir twa. Imin pena kontrol lor so aksion ek so panse, parski anverite, seki fer tou li Bondie. To enn pastan pou li, parey kouma ena plizir lezot. Laplipar ditan bann Bondie zot swazir bann non krwayan ek bann artist ki bles so ego parski souvan bann artist vinn kreater bann kistoz ki pli zoli ki bondie inn kre. Tou bann bondie ki posed lezot planet, zot ena bann pastan orib ! Enn fwa par an zot zwenn ek zot rakont zot bann kriote avek plezir. Mo bien sagrin pou twa, me parey kouma lezot, monn gagne lord pou tret twa par to aksion ek non pa tret twa kouma enn viktim. Fasilit mo travay, swiv mwa.

Marsel tom azenou

MARSEL : Ki pou ariv Izabel ? Monn gat lavi Madlenn, monn gat lavi mo tifi, monn detrir Bernar so lavi pezib ek kas Mari so leker. Izabel to pou viv dan laont ek dezespwar. Mwa kinn esey fer tou pou sanz mo lavi, mwa kinn esey tou pou repar mo bann erer ek viv enn lavi normal, enn lavi moral. Me mo zis enn sat nwar degize dan plizir kouler pou atir lezot, ek detrir lavi tou dimounn ki monn krwaz zot sime. Izabel, mo gate, zot inn donn nou lamour ek fri nou lamour ki dan to vant enn move non...

Zinzin poz so lame lor Marsel so zepol

ZINZIN : Sak fwa mo al asers enn lam kinn pas dan bann move tour ki Bondie ti kre, zot koz mem langaz, mem parol sorti depi zot labous. Pa ki monn plin tann sa, me sa fer mwa trist seki pe ariv zot. Ek parey kouma zot mo pa kapav fer nanie. Nou bann inkapab. Nou pou an retar ek to pinision pou riske ogmante. Pa demann mwa kan li pou fini, sa depann lor Bondie. Ena plizir milye ki linn blie ki pe sibir pinision pou nanie. Vini kamarad, nou dan mem bato sof ki mwa mo enn temwin inpwisan, ek twa to enn viktim inpwisan. Leve.

Marsel leve ek Zinzin trap so lebra. Rido.



Pu pyes « Destin », Tahir Pirbhay ti ranport pri meyer dramaturz an kreol dan enn konpetisyon organize par Minister Lar ek Kiltir an 2005.

An zanvye 2008, Tahir Pirbhay so premye liv « Bann Fler Sovaz » – enn rekey poem ekpanse - ti pibliye ek li ti sign sa liv la lor non Kabir Hussien.

© Tahir Hussien Pirbhay

tahir.pirbhay@gmail.com

<http://pirbhay.official.ws>